

wegkreiz

vor a poar joahr im mai
hot a se darennt
an dera stell

und allerwal wieder
um de zeit
stehngan do im senfglasl
frische himmelschlüssal

aber eahm
hot da zündschlüssel glangt
zum aafsperrn vom himmel

in da friah

aus da hollerstauern
wachs'n schwarz de amsln außa

de singan liader

net über des was sei werd
net über des was gwen is
grad über des was is

aber des was satt und fett und finster is
des werd mager und magerner

bloß in da hollerstauern bleibn no
a poar kloane fetzerl hänga
vo da nacht

harald grill

am stammtisch

jedn schwuarzn tag
lass ma dasauffa
wia r a kloane katz im sack

aber danach
druckt uns unser gwissen

wenn s katzerl hätt auswachsn derfa
vielleicht hätts uns de mäus vertrieb
drobn im dachbodn vo unserm kopf

3

wia s d as machst is s verkehrt

hinterm wind nachelaaffa
do machst di zum kasperl

vorm wind herlaaffa
do machst di mit schuldig

gegern wind orenna
des kaannt da
dei gnaack brecha

vielleicht
flach aafn bodn hilegn
nix hörn nix sagn nix wissn

dann tatschn s di zamm

de wo gegern wind orennan
de wo vorm wind herlaaffan
de wo hinterm wind nacherennan

harald grill

bauerngoartn

dafaults obst

laare schnecknhäusln

dabissne mausköpf

und unterm zwetschgnbaam

neberanander liegn staad

da alte neie wagn

und da ganz da alte neie wagn

oa totalschadn neberm andern

maß nehma

nach blaga dimitrowa

weit gspannt

vo oana flüglspitzn zur andern flüglspitzn

des is as maß wo da vogl hot

fürn horizont

ans kreiz gschlagn

vo oana hand zur andern hand

des is as maß wo da mensch hot

fürn himmel

harald grill